

EXITOSO PRIMICIA DI E GRANDWORLD TOUR DI JUAN LUIS GUERRA Y 4:40

Na Puerto Rico cu cuatro concierto



Aki por mira e grupo di 4.40 den studionan di TeleMundo na Puerto Rico.

ORANJESTAD (AAN): Dia cuatro di juli siman pasa Juan Luis Guerra y su 4.40 hunto cu nos Principe Arubano Hildward Croes a inicia cu nan gira mundial na Puerto Rico. Diario su reportero di farandula Jan Poets DEN AMBIENTE tabata na Puerto Rico pa cubri tur e cuatro conciertonan y tambe un grabacion na e planta di television mas grandi di Pto. Rico Tele Mundo.

E invitacion special aki a bin di parti di Juan Luis via Hildward Croes, debi cu DIARIO a escoge Hildward como MAN OF THE YEAR 1991, y tambe e atencion semper cu Jan Poets sa tin pe ora e ta na Aruba. Tambe Jan Poets a haña un trato di V.I.P. cerca e famoso grupo aki. E grupo a keda den e luhoso Condado Plaza Hotel & Casino na San Juan, caminda Jan Poets tabata tin e honor pa hospeda hunto cu Hildward Croes y e pianista Elvis Cabrera.

E primicia a tuma lugar diahuebs y diabierna na Bayamon, den Ruben Rodriguez Coliseum, caminda ocho mil alma a presencia y goza di un tremendo show nobo especial pa e gira aki. Di comienzo te na final e publico a biba cu e espectacular di 4.40, nan tabata aplaudi cada cancion y lanta baila ora nan toca e merenguenan inmortal manera Amor de cunucu, rosalia, la bilirrubina, si tu te vas, guava berry, a pedir su mano y etc. Riba tarima tabata tin efec-tonan di luz combina cu huma cu a ser importa for di Inglaterra especial pa e shownan aki.

Tabata un show colorido y di alto nivel. E sonido tabata perfecto, debi cu e coliseum ta



full cera cu airco y tambe nan tabata haci soundcheck for di tres di atardi, pa garantisar e sonido. Diabierna prome cu e show di 4.40 e idolo di Venezuela Ilan Chester a

duna su presentacion cu no a cai na agrado di e publico y a ser di boe. E motibo tabata cu Ilan tabata canta demasiado largo pa haña acogida, pero e publico tabata masha ansioso pa Juan Luis Guerra y 4.40.

Tambe e anochi aki a haña un 'boe' formal e Gobernador di Pto. Rico Colon Hernandez ora el a worde introduci. Al contrario Juan Luis Guerra y su musiconan si tabata haña aplausonan sin fin. E momento mas historico pa nos dushi isla Aruba tabata ora cu e cantante Roger Zayas a introduci "desde Aruba el Principe Hildward Croes". Akinan Hildward a haci un demostracion di su talento riba su instrumento electronico y a haña un yobida di aplauso y hasta e Gobernador a bati man pa Hildward.

E momento historico aki Jan Poets tin e graba riba su

cassette. Diasabra y Diadomingo e gira a continua den Palacio de los Deportes na Mayaguez cual ta tres ora for di San Juan. Dialuna nan tabata den studio ocho di e canal di television Tele-Mundo pa graba seis cancion y tambe nan ultimo hit den e show di Marcano cual ta e show mas popular na Pto. Rico.

Tur e cuatro conciertonan aki tabata 'sold out' y na Tele Mundo no tabata tin lugar pa pone hende. Segun e corant di mas grandi di Pto. Rico 'San Juan Star', ta masha poco grupo musical por a logra cuatro concierto "Full House" na Pto. Rico. Dialuna anochi pa ocho'or nan a continua cu nan "Grand World Tour" di Pepsi-Cola pa Spaña caminda nan lo duna bintidos concierto den diferente ciudad. Diasabra venidero den e columna di Jan Poets "Den Ambiente Cu Nos Artistanan" nos lectornan por aprecia mas foto's, y bida di un musico ora nan ta den gira y tambe con yama e hit nobo di Juan Luis Guerra y 4:40.



Hildward Croes aki ta demostrando su talento.

Publico y hasta Gobernador di Puerto Rico ta aplaudi Hildward Croes durante su presentacion solo riba keyboards.

